

大乘阿毗達磨雜集論述記卷第十三

唐京兆大慈恩寺沙門窺基撰

云何有漏。幾是有漏。爲何義。故觀有漏耶。謂漏自性故。漏相屬故。漏所縛故。漏所隨故。漏隨順故。漏種類故。是有漏義。漏自性者。謂諸漏自性。漏性合故名爲有漏。漏相屬者。謂漏共有心心所及眼等漏相應故。漏所依故。如其次第名有漏。

有漏中漏相屬眼等所依。卽通根境依起漏故。不爾。攝法不盡。六十五。五相有漏。如瑜伽大好。漏所縛者。謂有漏善法。由漏勢力招後有故。

解漏所縛。唯以自所緣及同時第七漏故。然總名有漏及漏種類。但可前有漏種子所生名種類。不可爲他緣。故成有漏。如唯識第五第七識中難等。漏所隨者。謂餘地法。亦爲餘地諸漏麤重所隨。逐故。漏所隨者。不由他漏種。故自地成有漏。但由彼餘地漏。還隨餘地。如未至定識。還爲根本地煩惱隨。故隨增名有漏識。是此中意。

漏隨順者。謂順決擇分。雖爲煩惱麤重所隨。然得建立爲無漏性。以背一切有順彼對治故。漏種類者。謂阿羅漢有漏諸蘊。前生煩惱所起故。五取蘊十五界十處全。及三界二處少分。是有漏。謂除最後三界二處少分。聖道眷屬及諸無爲。非有漏故。爲捨執著漏。合我故。觀察有漏。

漏隨順。謂決擇分善等者。泰法師等云。有漏中所。有無漏性。此如唯識第二破分別論者說。此中三釋。一新熏。此善體有漏。能爲增上。或因緣生見道。故建立爲無漏性。加行道等名道諦體有漏。故修道斷。二唯本有。此位無漏增長之種名無漏性。現行及因緣聞熏等。是有漏。故麤重隨。修道斷。有漏。從無漏種。故加行道等名道諦體有漏。修道斷。新

舊互用類此應知。此中六種初二攝一切盡。瑜伽五種有二攝盡。爲論性分別。更離後四。瑜伽六十五亦爾。

云何無漏幾是無漏。爲何義故觀無漏耶。謂有漏相違是無漏義。五無取蘊全。及三界二處少分。是無漏。爲捨執著離漏。我故觀察無漏。

無漏中六十五說有五種。一離纏名無漏。卽諸善無記心心所及所依所緣諸色。二睡眠斷故名無漏。謂已斷見修惑。所有善及一分無記造色等言。一分造色。以餘報色業所生。故不名無漏。無記心

中應言一分據實而言。理應報色亦是以一分造勝故徧說。一睡眠斷。故二不從漏生。故此由未了應更思之。此中五無漏攝一切無漏盡。當知廣如彼說。此中言十五界全有漏等。佛地唯識第十二說。此但依二乘等說。

云何有諍。幾是有諍。爲何義故觀有諍耶。謂以依如是貪瞋癡故。執持刀杖發起一切鬪訟違諍。執持刀杖等是諍。因貪等是諍。自性如是。彼自性故。彼相屬故。彼所縛故。彼所隨故。彼隨順故。彼種類故。是有諍義。乃至有漏有爾所量有諍亦爾。彼所隨義故。爲捨

執著諍合我故。觀察有諍。

有諍中以執杖爲諍因。貪等爲諍性。六十五以三苦爲有諍事。貪等爲諍因。此中釋論解諍因及性。彼解有諍自性及諍因。不相違。又此論據疎因。彼據親因。又此據成滿執杖爲因。彼據方便貪等爲因。又此中貪等爲性。以貪等時三苦各增上。不相違也。又彼第二復次。五因釋卽與此同。

云何無諍。幾是無諍。爲何義。故觀無諍耶。謂有諍相違。是無諍義。乃至無漏有爾所量無諍亦爾。爲捨執著離諍我故。觀察無諍。云何有染。幾是有染。爲何義。

故觀有染耶。謂若依如是貪瞋癡。故染著後有自身。彼自性故。彼相屬故。彼所縛故。彼隨逐故。彼隨順故。彼種類故。是有染義。染著後有者。謂貪瞋癡。是染著後有因。故名染。云何瞋恚是染著後有因。謂由憎嫉。諸清淨法染著後有故。如是乃至有諍有爾所量有染亦爾。爲捨執著染合我故。觀察有染。

有染中。據三毒。前第一卷有味唯貪。前據潤生內愛。此據潤生三毒。唯緣內道三界。餘如前說。

云何無染。幾是無染。爲何義。故觀無染耶。謂有染相違。是無染義。乃至無諍有爾所量無染亦爾。爲捨執

著離染我故觀察無染云何依耽嗜幾是依耽嗜爲
何義故觀依耽嗜耶謂若依如是貪瞋癡故染著五
欲彼自性故彼相屬故彼所縛故彼隨逐故彼隨順
故彼種類故是依耽嗜義何等瞋恚能起染著謂憎
嫉出離如是乃至有染有爾所量依耽嗜亦爾爲捨
執著耽嗜合我故觀察依耽嗜云何依出離幾是依
出離爲何義故觀依出離耶謂依耽嗜相違是依出
離義乃至無染有爾所量出離亦爾爲捨執著離耽
嗜我故觀察出離。

耽嗜出離體性如第一卷。

云何有爲幾是有爲爲何義故觀有爲耶謂若法有
生滅住異可知當知是有爲義一切皆是有爲唯除
法界法處一分爲捨執著無常我故觀察有爲云何
無爲幾是無爲爲何義故觀無爲耶謂有爲相違是
無爲義法界法處一分是無爲爲捨執著常住我故
觀察無爲問無取五蘊當言有爲當言無爲答彼不
應言有爲無爲何以故諸業煩惱所不爲故不應言
有爲隨欲現前不現前故不應言無爲所以者何無
取諸蘊隨所欲樂若現前若不現前無爲不爾以常
住故問如薄伽梵說一切法有二種謂有爲無爲云

何今說此法非有爲非無爲耶。答此亦不離二種故。所以者何。若由此義說名有爲不以此義說名無爲。若由此義說名無爲不以此義說名有爲。依此道理唯說二種。何以故。隨欲現前不現前義。故說名有爲。諸業煩惱所不爲義。故說名無爲。是故此亦不離二種。

解無爲中攝論第九法身有爲無爲無二爲相。亦有此義。此示現變化等變。故無無爲相。此中但說無取五蘊。據實通餘無爲。

云何世間。幾是世間。爲何義。故觀世間耶。謂三界所攝及出世智後所得似彼顯現。是世間義。似彼顯現者。謂似三界所攝相顯現似真如等。所現相貌。是出世間。未曾得故。如是諸蘊一分十五界十處全。及三界二處一分。是世間。一分者。謂除正智所攝及後所得似出世間相顯現。并無爲法。爲捨執著世依我故。觀察世間。云何出世。幾是出世。爲何義。故觀出世耶。謂能對治三界無顛倒無戲論無分別故。是無分別出世間義。能對治三界者。謂諸聖道。此復二種。一聲聞獨覺所得對治常等顛倒無顛倒分別故。名無分別。二菩薩等所得對治一切色等法戲論無戲論分

別故。名無分別。諸無爲法。非一切分別所依處。故名無分別。又出世後所得。亦名出世。依止出世故。如是諸蘊一分。及三界二處一分。是出世。爲捨執著。獨存我故。觀察出世。

世出世間中有三對。一有起盡名世。無爲是出世。二有相顯名世。卽此文是。後得似世間相故。三有漏有對治名世。翻此名出世。世間出世間中。如唯識佛地。二智有相見等三說。二乘唯除常等顛倒。菩薩除一切。二乘無漏心。非有治出觀後心。爲所治。有說亦所治。以無漏心有法執故。如佛地第十

中。對治三界者。應言對治三界顛倒。分別故。是無分別。出世間義。爲解對治三界言。無顛倒故。又無我法分別。名無分別。出世間義。又無分別是無分別。出世間義。

云何已生。幾是已生。爲何義。故觀已生耶。謂過去現在。是已生義。一切一分。是已生。爲捨執著。非常我故。觀察已生。

非常我者。是法執。或我所也。

又有二十四種已生。謂最初已生。相續已生。長養已生。依止已生。轉變已生。成熟已生。退墮已生。勝進已

生清淨已生。不清淨已生。運轉已生。有種已生。無種已生。影像自在示現已生。展轉已生。剎那壞已生。離會已生。異位已生。生死已生。成壞已生。先時已生。死時已生。中時已生。續時已生。最初已生者。謂初續生時。相續已生者。謂續生已後。長養已生者。謂由眠夢飲食梵行定爲因。四種長養。

瑜伽說五長養。加避不平等。約長養有四。以事麤故。世共了故。說食有攝四別義。故飲通二。一種通二義。故餘三長養。義不攝別義。不名爲食。餘之三食非事麤。故非世共了。同此不說。

依止已生者。謂內諸根。轉變已生者。謂能隨順生樂受等。諸根變異。成熟已生者。謂於衰老位。退墮已生者。謂捨善趣。生惡趣中。勝進已生者。謂與彼相違。清淨已生者。謂遊戲妄念。意相憤怨。樂變化。天他化。自在。色無色界諸天。多放逸故。隨其所應於所受用境。及所住定自在而轉。

遊戲忘天等者。此中但以欲界第五第六之天。大論第五謂欲界天。名遊戲忘念。意相憤怨。俱舍等亦爾。此解不爾。違卽通六天。或唯有此二天。今且據勝天。有多放逸故。戲忘念。恚天。於境是自在於

定自在。色無色界。其地居二天。不清淨。攝以有殺害等事故。或清淨等。攝化生故。今攝勝故。清淨者。謂作處資具相似故。

清淨已生中。謂遊戲忘念。意相憤怒樂變化。天他化自在。是以二邪願生天。一現住欲塵。一切人及下四天。雖人亦是變除彼人。及下二天。以猶有他害故。二自變欲塵。三他化欲塵。此二如名二空天。是遊戲。是恚憤。雖此通上四天。以彼別得名故。此標唯下二天。勘瑜伽第五。二處小別。

不清淨已生者。謂彼所餘。運轉已生者。謂往來位。有

種已生者。謂除阿羅漢最後蘊。無種已生者。謂最後蘊。

無種已生。如唯識第四及攝論第二。

影像自在示現已生者。謂所知事同分色。解脫所生色。及如來等色。如其次第。

影像自在示現者。或第一假想入解脫等色。二定境實色。第三佛色。或初方便色觀未成故。次根本色觀已成故。後同前。初假想色。次真實果定障得名解脫所生。此二依實法。後一示現。應知此三。可能變質。

展轉已生者謂前後生相續。剎那壞已生者謂一一剎那諸行相離。會已生者謂愛不愛於會離位。及心於有貪離貪等位。異位已生者謂於羯邏藍等位。生死已生者謂有情世間成壞已生者謂器世間。先時已生者謂本有。死時已生者謂死有。中時已生者謂中有。續時已生者謂生有。

四有差別。初中有十八。

合解二十四中。或分爲十二對義。準義有文。初三今後緣。次三住退。分次二昇墜。異次二白黑。殊次一業來往。次二有無。因次一質影。別次二時長促。

次一卽異分。次一凡聖。次二內外。次四時分。或分爲三門。初別明內色。次明內外色。後唯內色。

云何非已生。幾是非已生。爲何義。故觀非已生耶。謂未來及無爲法。是非已生義。一切一分是非已生。爲捨執著常住我故。觀察非已生。又已生相違。是非已生義。云何能取。幾是能取。爲何義。故觀能取耶。謂諸色根及心心所。是能取義。三蘊全色。行蘊一分。根相及相應相。如其次第。十二界六處全。及法界法處一分。相應自體。是能取。爲捨執著能受用我故。觀察能取。受用我者。計我能得愛不愛境。又能取有四種。謂

不至能取。至能取。自相現在各別境界能取。自相共相一切時一切境界能取。不至能取者。謂眼耳意根。至能取者。謂餘根。

能取中不至能取者。謂眼耳意。五十六云。十八界中六合能取。謂鼻舌身根識。四不合能取。謂眼耳根識。五及一少分非能取。謂色等五及法界少分。一界若合不合。二俱能取。謂眼界。此論約法界自境辨意。故不合能取。彼論便依諸根取境義。說若合不合俱能取。然諸根所籍多少。如唯識第七解。然此至能取。不如小乘有極微性觸便相入。今能

觸相名至俱有不名至無極微故。此中以識從根。說言眼等不至能取。瑜伽約界以辨根識別說。然佛諸根互用爲至根。取不至取。合二解。一卽眼處有餘識用不壞法相。此中通因果位說。二說若壞法相卽眼能聞聲等。此中唯因位說。四種中前二如是。後二以根從識取。

自相現在各別境界能取者。謂五根所生。自相共相一切時一切境界能取者。謂第六根所生。

自相有三。一處自相同。小乘二事自相。三自相自相。西方緣假實二義。若緣假者。依處自相。唯緣實

者依自相自相不依餘義。意識名一切時者約多相說故。又七識若處自相亦一切時。若自體義卽非自共相。第八識法體唯緣自相處卽通自共色等種子有二類故。

又由和合識等生故。假立能取性。所以者何以依眾緣和合所生識等假說能取不由真實義。諸法無作用故。

第三又由和合等者。此出取體。如前第二五十六釋。

云何所取。幾是所取。爲何義。故觀所取耶。謂諸能取。

亦是所取。以眼根等意識所取故。或有所取非能取。謂唯是取所行義。唯者決定義。此言爲簡心所有法。一切皆是所取。爲捨執著境界。我故觀察所取。云何外門。幾是外門。爲何義。故觀外門耶。謂欲界所繫法。是外門義。除依佛教所生聞思慧。及彼隨法行所攝心心所等。問。何故聞思所生慧。及彼隨法行所攝心心所等。非外門耶。答。等流法爲因故。由此勢力緣涅槃等。等流法者。謂諸佛眞證種類教法。鼻識舌識香味四界香味兩處全。及餘一分欲界所攝。是外門。爲捨執著不離欲我故。觀察外門。

外門中證等流法者。教教謂名等證。教謂真理。教
教法是證。教之種類。此聞思等是彼等流等。或聞
思等能緣涅槃。以涅槃爲因故。

云何內門。幾是內門。爲何義故。觀內門耶。謂外門相
違。是內門義。除四界二處全。及所餘一分。是內門。爲
捨執著離欲我故。觀察內門。云何染汙。幾是染汙。爲
何義故。觀染汙耶。謂不善及有覆無記法。是染汙義。
有覆無記者。謂徧行意相應煩惱等。及色無色界繫
諸煩惱等。諸蘊十界四處一分。是染汙。
染等諸釋可知。

染汙中謂徧行意相應煩惱等者。謂等取欲界身
邊二見及俱有法等。色無色界繫等等。取彼染汙
業。欲界無有覆業故。

十界者。謂七識色聲法界。四處者。謂色聲意法處。爲
捨執著煩惱合我故。觀察染汙。云何不染汙。幾是不
染汙。爲何義故。觀不染汙耶。謂善及無覆無記法。是
不染汙義。八界八處全。諸蘊及餘界處一分。是不染
汙。爲捨執著離煩惱我故。觀察不染汙。云何過去。幾
是過去。爲何義故。觀過去耶。謂自相已生已滅故。因
果已受用故。染淨功用已謝故。攝因已壞故。果及自

相有非有故。憶念分別相故。戀爲雜染相故。捨爲清淨相故。是過去義。因果已受用者。謂已生故。已滅故。如其次第。染淨功用已謝者。謂如現在貪等信等。令心染淨功能無故。攝因已壞者。置習氣已方滅故。果及自相有非有者。謂於今時所引習氣有故。能引實事無故。憶念分別相者。謂唯有彼所緣境相故。一切一分是過去。除未來現在及無爲故。爲捨執著流轉我故。觀察過去。

三世中戀爲染相。捨爲淨相者。謂貪縛爲染。於斷捨縛爲淨。未來中準可知。然此通依種現及唯識三世。已明諸憶念分別相。是唯識故。瑜伽第三有種子法三世。但是道理三世。此卷前六通中宿命等爲神通三世。如唯識第三。此中唯約小三世。十六中亦有大小內外等異。

云何未來。幾是未來。爲何義。故觀未來耶。謂有因非已生故。未得自相故。因果未受用故。雜染清淨性未現前故。因果自相有非有故。希爲雜染相故。不希爲清淨相故。是未來義。有因非已生者。爲簡無爲。彼雖非已生而無因故。未得自相者。自體未生故。因果未受用者。謂彼種子未作所作故。彼性未生故。一切一

分是未來。爲捨執著流轉我故。觀察未來。云何現在。幾是現在。爲何義。故觀現在耶。謂自相已生未滅故。因果受用未受用故。染淨現前故。能顯過去未來相。故作用現前故。是現在義。因果受用未受用者。謂因已滅。故果猶有故。能顯過去未來相者。謂現在世是能施設去來世相。所以者何。依止現在假立去來故。約當得位假立未來。約曾得位假立過去。作用現前者。謂眼等法正爲識等所依等事故。一切一分是現在。爲捨執著流轉我故。觀察現在。問。何故過去未來現在說名言事。非涅槃等耶。答。內自所證不可說故。

唯曾當現是言說所依處故。所以者何。因說過去等事。遂顯經中三種言事。謂依三世建立非涅槃等。由彼內自所證離名言故。不可宣說。又唯去來今是見聞覺知言說所依處故。

因顯經中三種言事。謂阿毗達磨經也。若此卷初一切皆待名言。卽涅槃亦有名。七十三一切法不可言。三世亦離名。何故此中及涅槃二十三卷云。是大涅槃強而立名。對不言諸法。以言依與言同。有爲世攝。相似故說三世爲言依。唯識第三及七十三等說不得法自體言一切法皆不可言。不相

違也。如俱舍第一解。

云何善。幾是善。爲何義。故觀善耶。謂自性故。相屬故。隨逐故。發起故。第一義故。生得故。加行故。現前供養故。饒益故。引攝故。對治故。寂靜故。等流故。是善義。

善中十二善。準唯識第三唯云四種。卽種子不相應等。皆等起中攝。由此種子可有隨本識。是無記。故亦名隨逐。此中義用分之。立餘八種也。十三種分四。初四種類攝。次三別類攝。次三世閒善。次三出世善。

五蘊十界四處一分是善。十界者。謂七識色聲法界。

四處者。謂色聲意法處。

色聲等通善者。如前數說。

爲捨執著法合我故。觀察善。自性善者。謂信等十一心所有法。相屬善者。謂彼相應法。隨逐善者。謂卽彼諸法習氣。發起善者。謂彼所發身業語業。第一義善者。謂眞如。生得善者。謂卽彼諸善法。由先串習故。感得如是報。由此自性。卽於是處。不由思惟。任運樂住。卽於是處者。謂於信等處。由此自性。不由思惟者。謂無功用。不假善友力等。任運樂住者。非唯欲樂。是生得。亦信等俱任運起故。

卽於是處謂於信等處者。彼云謂卽受信等果處。處謂處所。今解如五十五信於決定時生。乃至攝眾生時有不害。此等卽生信等處。

卽於是處者謂於信等處者。五十五說十一善於六時起。謂於決定時有信。止息染時有慚愧。善品時有三善根精進。世閒道時有輕安。出世道有不放逸捨攝眾生時有不害。

加行善者。謂依止親近善丈夫。故聽聞正法。如理作意。修習淨善。法隨法行。修習淨善者。謂於正法中一切聞等所生善法。

加行善中。修習淨善是總。法隨法行亦是總。通三慧。如說修行法。謂滅諦。隨法謂道諦等。或道諦法是隨滅諦法行。唯有修道諦。如攝大乘等說。卽四親近行也。

現前供養善者。謂想對如來。建立靈廟。圖寫尊容。或想對正法書治法藏。興供養業。

現前供養。卽住持三寶。然略不說僧。或興供養。卽供僧也。

饒益善者。謂以四攝事。饒益一切有情。引攝善者。謂以施性福業事。及戒性福業事故。引攝生天樂異熟。

引攝生富貴家。引攝隨順清淨法。引攝生天樂異熟及生富貴家者。顯得尊貴因。引攝隨順清淨法者。顯得涅槃因。

引攝善中。此唯說散善。瑜伽亦說修。此中準俱舍業品。有施性福業。非事福事。非業業事等。如彼論說。生天生富貴家。是福分善。順清淨法。是解脫分法。

引攝善中。如瑜伽第十及準不善應言得人天引果。三惡趣別報果。以對方便善。略而不論。

對治善者。謂厭壞對治。斷對治。持對治。遠分對治。伏

對治。離繫對治。煩惱障對治。所知障對治。此諸對治。後當廣釋。

四對治六十三伏離對治二障對治。此上三對治。各攝義周。據義別說漏等。如理應知。下第九中釋。寂靜善者。謂永斷貪欲。永斷瞋恚。永斷愚癡。永斷一切煩惱。若受滅。若有餘依涅槃界。若無餘依涅槃界。若無所住涅槃界。如是皆名寂靜善法。等流善者。謂已得寂靜者。由此增上力。故發起勝品神通等。世出世共不共功德。

寂靜善中。乃至受滅。此性定障一對。不言不動。

者定障未盡故。或未必此中唯取無爲。卽滅定爲體極寂靜故。若斷定障卽亦此攝。涅槃或說一謂大般。或說二。謂有無餘及息處二。或大小二。如涅槃經。或說三。此論中說得位。或說四。成唯識中成得合說故。或說五。涅槃更加方便淨。涅槃如下滅諦中。謂三種涅槃。如下滅諦中說。然有餘無餘因果及無住處體二說。如唯識第十方便淨卽真如。因方便顯淨義邊說。無別體也。如唯識第十無方便淨體。

云何不善幾是不善爲何義故。觀不善耶。謂自性故。相屬故。隨逐故。發起故。第一義故。生得故。加行故。現

前供養故。損害故。引攝故。所治故障礙故。是不善義。五蘊十界四處一分。是不善。爲捨執著非法合我故。觀察不善。自性不善者。謂除染汙意相應及色無色界煩惱等。所餘能發惡行煩惱隨煩惱。此復云何。謂欲界繫不任運起者。是不善。若任運起能發惡行者。亦是不善。所餘是有覆無記相屬不善者。謂卽此煩惱隨煩惱相應法。隨逐不善者。謂卽彼習氣發起不善者。謂彼所起身業語業。第一義不善者。謂一切流轉。生得不善者。謂由串習不善故。感得如是異熟。由此自性卽於不善任運樂住。加行不善者。謂依止親

近不善丈夫故。聽聞不正法。不如理作意。行身語意惡行。現前供養不善者。謂想對歸依隨一天眾已。或殺害意爲先。或邪惡見爲先。建立祠廟與供養業。令無量眾廣樹非福。殺害意爲先。建立祠廟者。謂於是處害牛羊等以祭天神。邪惡見爲先。建立祠廟者。謂於是處受自餓等苦求福求願。損害不善者。謂於一切處起身語意種種邪行。引攝不善者。謂行身語意諸惡行已。於惡趣善趣引攝不愛果異熟。或引或滿於惡趣中。具受引滿果異熟。於諸善趣唯受滿果。謂生彼已由惡行力受貧窮苦。所治不善者。謂諸對治

所對治法。障礙不善者。謂能障礙諸善品法。如數與眾集等。

不善中準佛性論。修道發業。見道潤生。彼論第四云。不動業增長因者。一思惟能成業。二見能得果。何以故。斷思惟盡業不成故。斷見諦盡不感果故。思惟者。卽修道煩惱。十二不善中分四。準前。

云何無記。幾是無記。爲何義故。觀無記耶。謂自性故。相屬故。隨逐故。發起故。第一義故。生得故。加行故。現前供養故。饒益故。受用故。引攝故。對治故。寂靜故。等流故。是無記義。八界八處全。及餘蘊界處一分。是無

記。八界者。謂五色根香味觸界。八處亦爾。爲捨執著離法非法我故。觀察無記。自性無記者。謂八色界處。意相應品命根眾同分名句文身等。

自性無記中八色界處。唯取長養諸根外諸所有色處等。非異熟生所攝者。除善染色聲處。以異熟色等是生得無記攝。六十六有五種無記根者。異熟生攝故。然異熟生有三文。一真異熟名異熟生。如六十六。二假異熟名異熟生。如前第一卷受中說。然六十六復說三性法皆名異熟生。今卽除第三中善染及除第一第二及第三中無記之法善

惡業果餘長養等流等異熟生法。是自性無記。然佛地論立四無記心。異熟辨故。不明於色。卽法執類故。於五無記中。前四通五蘊。第五唯色蘊。然今此論卽意相應品及命根等。皆通名自性無記。又此八色界等。隨順門及約因說。故無記也。彼師以無想異熟及第八識根色等。是生得無記收。以無想報是報故。命根等通報非報故。此自性攝。此亦不然。成唯識說。唯是異熟故。卽無想報亦自性收。是自性下等字所等故。然此等字論有無者。其集論本有也。故更應中取等欲界身邊見及相應法

等下無收處故。以命根等雖是報以是假故。自性收不同本識。今解自性攝一切唯無記法。攝論無性第三不許立五無記勘。

相屬無記者。謂懷非穢非淨心者。所有由名句文身所攝受心及心所。非穢非淨心者。顯善不善相違心。由名句文身所攝受者。顯彼行相義。以彼意言門轉故。

相屬無記者。謂懷非穢非淨心者。此者是假者也。由名句文身所攝受者。顯彼行相義。以彼意言門轉故者。彼云顯彼行相者。謂威儀工巧心及心所。

由名句文身所攝受。威儀工巧心顯彼名句文身行相。今解不然。此言相屬無記故。卽顯此威儀等心行相。此心由名等所攝受。故成無記。今顯此心行相由名等故。爾卽言顯彼行相義。以彼意言門轉故者。彼云意謂意識。言謂音聲轉。謂現起。以彼名句文身依威儀等意識所發言語音聲門現起。轉故。又解。由名句文所攝受者。謂威儀工巧見分心變作相分名等。然此見分心由相分名等所詮。辨故言由名等所攝受。顯彼行相者。此名等是能詮彼見分心行相義。以彼意言門轉者。以者由也。

此名等由依彼見分意識爲門此相分名等方得轉起。今解顯彼行相如前自解。以彼意言門轉者。謂名等是無記。有依音聲名等有唯意言名等意。中詮辨如名等故說爲名等。以彼名等意言依意爲門而轉。故所依心等成無記性。是此中意也。

隨逐無記者。謂卽彼戲論習氣。以名身等熏習心故。由此習氣後戲論生。發起無記者。謂彼所攝諸心心所所發身業語業。彼所攝者。謂懷非穢非淨心者。所。有名身等戲論行相所攝心。心所第一義無記者。謂虛空非擇滅。生得無記者。謂諸不善有漏善法。異熟

加行無記者。謂非染非善心者。所有威儀路工巧處法。非染非善心者。此顯若非染非善心所發威儀路等。是無記性。所餘隨其所應。或善或不善。

威儀路工巧處。威儀依於道路。工巧依於處所。不可易名。又威儀與業性色作路。工巧依止事業處。得。又威儀以根色爲路發得。工巧依根色爲處發得。或與心爲路爲處。

現前供養無記者。謂如有一想對歸依隨一天眾遠離殺害意邪惡見而建立祠廟興供養業。令無量眾於如是處不生長福非福。

提婆菩薩釋楞伽經中外道小乘涅槃論中說自
在天造眾生等名現前供養無記。

饒益無記者謂如有一於自僕使妻子等所以非穢
非淨心而行惠施受用無記者謂如有一以無簡擇
無染汙心受用資具無簡擇心者爲別善性無染汙
心者爲別不善性引攝無記者謂如有一於工巧處
串習故於當來世復引攝如是相身由此身故習工
巧處速疾究竟對治無記者謂如有一爲治疾病得
安樂故以簡擇心好服醫藥寂靜無記者謂色無色
界諸煩惱等由奢摩他所藏伏故等流無記者謂變

化心俱生品是證等流故名等流無記變化心相應
共有等法名俱生品此心心所謂嬉戲故發起變化
是無記性若爲利益安樂有情當知是善復有示現
善不善無記法此復云何謂佛及得第一究竟菩薩
摩訶薩爲欲饒益諸有情故有所示現當知此中無
有一法真實可得有所示現者謂佛菩薩由所化有
情力故示現種種善不善等示現不善者謂化作賊
等示現斷其首足等事怖餘有情令調伏故。

華嚴經第四十九善財求善知識有王名滿足彼
害眾等名示現不善報恩經中佛在舍衛國崛山

中有五百人斷道却人。佛化乘鴈。彼等皆是。然是後得智中大悲所作。若菩薩實與煩惱相應。又由大悲所引。後得智後起也。此煩惱猶如咒藥所伏諸毒。不爲過失。

云何欲界繫。幾是欲界繫。爲何義。故觀欲界繫耶。謂未離欲者。所有善不善無記法。是欲界繫義。未離欲言顯。猶未離少分欲界欲。是未證得三摩地義。若異此者。非至定法。亦應是欲界繫。所以者何。由彼已得三摩地故。愛樂斷滅。以所治麤重少分斷故。亦得說有一分離欲。外諸色等。是未離欲業增上力所生故。

亦名欲界繫。

三界繫中。欲界言未離少分欲等。此意明已離少欲。初未至定。不應是欲界繫。然顯揚云。若生於此。未得對治。或得已出三時現行。義謂一未得治。二已得治。三已出欲界染汙法。然染無記法現行。瑜伽論六十六同顯揚。然六十六亦有小異。勘之。顯揚文勝。

經言一切有情。共有業增上力所生者。爲顯生色無色界者。亦有未離欲業種隨逐故。

此有三釋。外器何人業感。如唯識第二大智度論

說色界天來此欲界化作其地自於中住若以第七俱意成有漏身在下地起上地心與下七俱起由此名有漏據相順者非此相違外器界等皆由隨眠成有漏如六十六。

四界二處全及餘蘊界處一分是欲界繫四界者謂香味鼻舌識界二處者謂香味處餘一分者謂除色無色界繫及無漏法爲捨執著欲增上我故觀察欲界繫。

欲增上我者外道執欲界增上法爲我故或我非欲與欲界爲增上繫。

云何色界繫幾是色界繫爲何義故觀色界繫耶謂已離欲界欲未離色界欲者所有善無記法是色界繫義除前所說四界二處餘蘊界處一分是色界繫一分者謂除欲無色界繫及無漏法爲捨執著離欲界欲我故觀察色界繫云何無色界繫幾是無色界繫爲何義故觀無色界繫耶謂已離色界欲未離無色界欲者所有善無記法是無色界繫義三界二處四蘊一分是無色界繫三界者謂意界法界意識界二處者謂意處法處四蘊者謂受等亦有二摩地所生色少故不說一分者謂除欲色界繫及無漏法爲

捨執著離色界欲我故觀察無色界繫。

無色界亦有定色少故不說者。五十三同。維摩經云。眾生空者。如無色界色。乃至阿羅漢預流三毒等。仁王經云。佛說經時。無色諸天雨天妙華。華如車輪。積如須彌。華嚴云。菩薩鼻根聞無色界宮殿之香。阿含經云。舍利弗。般涅槃時。無色天空中。淚下如春細雨。波舍波提入涅槃時。色無色天佛邊側立。故無色者。無業果色。言有色者。有定果色。一分等。

復次。有一分離欲。具分離欲。通達離欲。損伏離欲。永害離欲。一分具分離欲者。謂或依地離欲說。若於此地。乃至能斷八品煩惱。是一分離欲。若已斷第九品。是具分離欲。或依薩迦耶離欲說。若有學位。是一分離欲。若無學位。是具分離欲。通達離欲者。謂由見道離欲。損伏離欲者。謂由世閒道離欲。永害離欲者。謂由出世閒道離欲。復有十種離欲。謂自性離欲。損害離欲。任持離欲。增上離欲。愚癡離欲。對治離欲。徧知離欲。永斷離欲。有上離欲。無上離欲。如是十種離欲。當知是違背義。不必斷義。由自性故。離欲名自性離欲。乃至由永斷故。離欲名永斷離欲。如是諸句義分。

別種類應知。自性離欲者。謂於苦受及順苦受處。法
生厭背性。損害離欲者。謂習欲者。暢熱惱已。生厭背
性。任持離欲者。謂飽食已。於諸美膳。生厭背性。增上
離欲者。謂得勝處已。於下劣處。生厭背性。猶如世間
已得城主等勝位已。於村主等下劣位。生厭背心。愚
癡離欲者。謂諸愚夫。於涅槃界。生厭背性。以不了達
寂靜性故。及堅實著薩迦耶故。對治離欲者。謂由世
出世道。斷諸煩惱。徧知離欲者。謂已得見道者。於三
界法。生厭背性。由徧了知行苦性已。厭背一切有漏
事故。永斷離欲者。謂永斷地地諸煩惱已。生厭背性。

有上離欲者。謂諸世閒聲聞獨覺。所有離欲。無上離
欲者。謂佛菩薩。所有離欲。爲欲利樂諸有情故。

又十種離欲中。三性分別。漏無漏。三乘凡聖等分
別。

十離欲中。古說前四。通善染汙。無記中。今解不然。
初自性通三性。損害愚癡。唯染汙。任持及增上。唯
無記。後五唯善。其自性及後五。通無漏。其對治及
無上。不通有漏。或唯對治。不通有漏。損害任持增
上。愚癡。唯有漏。後五及自性能斷。餘四不能。

云何有學。幾是有學。爲何義。故觀有學耶。謂求解脫

者。所有善法。是有學義。從積集資糧位已去。名求解脫者。當知求證解脫分位。名積集資糧位。十界四處。諸蘊一分。是有學。十界者。謂七識色聲法界。四處者。謂色聲意法處。爲捨執著求解脫我故。觀察有學。

有學中六十六唯預流以去。乃至不還。然五十七二十二根中。唯取加行道已去。如唯識解二十二根中。一根本位。二加行位。三資糧位。卽三分別也。五十六說亦同此。

云何無學。幾是無學。爲何義。故觀無學耶。謂於諸學處已得究竟者。所有善法。是無學義。以阿羅漢等於

增上戒心慧學處已得究竟。故名無學。十界名無學。蘊一分。是無學。爲捨執著已脫我故。觀察無學。云何非學。非無學。幾是非學。非無學。爲何義。故觀非學。非無學耶。謂諸異生。所有善不善無記法。及諸學者。染汙無記法。諸無學者。無記法。并無爲法。是非學。非無學。義。諸異生者。謂除求解脫者。以彼於諸學處。求修學故。卽名有學。有學。染汙無記者。如其所應。不善及有覆無記。是染汙。無學無記。是無記。八界八處。全及餘蘊界處。一分。是非無非無學。爲捨執著不解脫我故。觀察非學。非無學。

無學中。六十六說無學身一切善法。然六十二說滅定是非學非無學餘不相應解亦如是。滅定似涅槃靜寂故。非學非無學種子有進趣是學無學。此中據所依種說。瑜伽唯識據相及別義說。不違也。諸學無學無記諸法亦是俱非者。法執品類亦在其中。種子是學等。滅定隨之不論。又有學等中有生得善云何名學。生得善少分隨學亦隱不說。

大乘阿毗達磨雜集論述記卷十三